

KIMETZ FURUNDARENA AGIRRE

A Maila | Bertsoa | 1. saria

Kimetz Furundarena Agirre naiz, 16 urte ditut eta Batxilergoko lehenengo maila egiten ari naiz Ordiziako Jakintza Ikastolan. Kirol-ezberdinen eta politikaren jarraipena egitea gustatzen zait, eta horren inguruan irakurtzen dut. Horrez gain, Angeluko Powerchair Football-eko taldean jokatzen dut aurtengo ikasturtetik.



BELAUNALDIEN ARTEKO TALKAK

1. Nire aitonak kontatu zidan

eskolan bizitakoa,

lezioa ez ikastearren

jasotako eskukoa,

denen aurrean lotsaraztea

izaten zen ohikoa

eta etxera joan ondoren

gurasoen zartakoa.

2. Beraiek guraso bihurtzean

saiatu ziren hobetzen,

diziplina ta mugak bai baina

gauzak hobeto azaltzen.

Irakasleen ta gurasoen

esanak ongi betetzen,
gogorkeria askorik gabe
esanak errespetatzen.

3. Errespetuz eta ez beldurrez
erakusten jakiteko,
guraso eta irakasleak
ibiltzen ziren pareko.
Mugak jartze hori ez zen izan
haurrei kalte egiteko,
baizik beraien bizitzarako
prest egoten laguntzeko.

4. Gaur etxe askotan ikusten da
guzti hura desegiten,
guraso askok seme-alabak
diziplina gabe hezten.
Ordutegi, jarrera ta arau
beraien eskutan uzten,
eskubideen zakua bete,
betebeharrena husten.

5. Gaur eskolan, atsedeen orduan
izan dugu zalaparta,

futbolean gelakide batek
eman dit kristoren zarta.
Maisuak kanporatu egin du
ta alde egin du marmarka,
Gurasoek jakitean, berriz,
jaso du babes aparta.

6. Gurasoek galdu ote dute
hezkuntzan zuten papera?
Hezitzailea eta laguna
ez da figura berbera.
Garrantzitsua da aurkitzea
arazo honen irteera,
hobeto bizi ahal izateko
gizarte hontan batera.

DOINUA: Txiki-txikitik aitag eta amak